



MÓKUNTSKUECHA

para 5 kurhamarhikuecha
kómu nitamakueri ambe



Vol. 2, núm. 2 2020 PURÉPECHA

Rebista mámaru jási formatu jimbo: 93,354,000
Jarhasti 225 idiomecha jimbo

Awake! is published quarterly by Watchtower
Bible and Tract Society of New York, Inc.
© 2020 Watch Tower Bible and Tract Society
of Pennsylvania.

Para MÉXICO KA CENTROAMÉRICA
Congregación Cristiana
de los Testigos de Jehová, A.R.
Apartado Postal 895
06002 Ciudad de México
México

Exentaakajtsi lista ma iámindu
direksionicha jingoni ixú
www.jw.org/tsz/nena-karani-o-uandani.

Iáminduchi ménisi uanda- nhiata ambe jatsisínga, jamberi p'amenchakua ambe jimbo, engachi no sési ambe nitamanchajka, enga no sési jánhaskuarhijka o jimboka xáni uarhiperakua ambe jarhaska.

K'uiripuechaksí uékasíndi míteni andisí i ambe
úkuarhijki.

- Máruksí uandasíndi eskaksí jatsiska para ísí
kómu nitamani jarhani o eskaksí no ma ambe
uáka úni paraksí no kómu nitamakuarhini.
- Máteruechaksí uandasíndi eskaksí kómu
nitamakuarhisínga jimbokaksí no sési ambe
úska ini tiempu jimbo o tiempu ma jimbo
engaksí antesi irekapka.

Engaksí k'uiripuecha no sési ambe
úkuarhinchajka, nóksí úsíndi míteni
andiksísí kómu nitamakuarhijki.



¿Uékapirintsí Bibliaeri ambe
jorhenguarhini o eskaksíni
nema p'orhembipiringa?

Exe je www.jw.org/tsz

o karachijsíni je ma indeni
direksionicha jimbo engaksí
karakua jaka.

Ari publikasioni jindesti para jorhenguarhini Bibliaeri ambe, ka ánychikuarhita máesti enga úkuarhejka iámindu parhakupinirhu, jarhuatakuarhiparini imani tuminani jimbo engaksí k'uiripuecha íntspijka tsípikua jingoni. I publikasioni no ataranhantasíndi. Engajtsi uéjka íntspini sáni tumina, exe je donate.jw.org. Enga no karakata jauaka máteru ambe, tekstuecha karakata griegaecheri p'itakataksí jarhasti Bibliarhu *Jimbanj Eiatsperakua Tata Jesukristueri* (iási anapu karantskata jimbo). Tekstuecha karakata ebraecheri p'itakataksí jarhasti ixú *La Biblia. Traducción del Nuevo Mundo TNM*, 2019 utusi jimbo.

1

¿Tata Diosĩ úsini eskachi
kómu nitamakuarhiaka?

2

¿Jucha mismu
úsini eskachi kómu
nitamakuarhiaka?

3

¿Andiksĩĩ ambakiti
k'uiripuecha kómu
nitamakuarhijki?

4

¿Tata Diosijtsĩni
kueraaski parachi
kómu nitamakuarhini?

5

¿K'amakurhia ma jurhiani
kómu nitamakua?



AMBE ENGAKSĪ JAKAJKUJKA MÁRU RELIJIONICHA



Hinduismo

I relijionirhu anapuechaksĭ ísĭ jakajkusĭndi eskachi kómu nitamasĭnga imani ambe jimbo engachi úka ini tiempu jimbo o imani tiempu jimbo engachi antes irekapka. Eska k'uiripu ma nóteru kómu nitamasĭnguia enga arini ambe úkuarhinchajka enga arinhajka *moksha*, o sea, enga k'amarajkia imeri tiempu para andajpenuni jarhani. Para i ambe úni, jatsisti para jorhenguarhini nóteru uandanhiani i parhakupini anapu ambe jimbo.

Islam

I relijionirhu anapuechaksĭ ísĭ exesĭndi eska kómu nitamakua, kastigu máeska k'amanharkhintskuecha jimbo ka eska ts'éjkukua máeska. Seguni Sayyid Syeed enga orhejtsĭkujka Sociedad Islámica de América del Norte, uandasĭndi eskajtsĭni kómu nitamakua miátantasĭnga eskachi "méntkisĭ jatsiska para diosmaiamukua íntskuntani Tata Diosĭni iámindu kóntpe-ratechani jimbo ka eskachi jatsiska para jarhuataani imechani engaksĭ uétarhinchajka".



Judaísmo

Seguni ambe engaksĭ judiuecha jakajkujka jindesti eskachi niárasĭnga kómu nitamani ju-chari úkuecha jimbo. Máru judiuechaksĭ uandasĭndi eskaksĭ uarhiricha tsĭntaaka ka eskaksĭ ísĭ tátsekua niáraaka jurhimbikua jingoni kánhani imecha engaksĭ ísku jatini kómu nitamaka. Ka judaísmo místiko o kabalístiko jorhentpisĭndi eska k'uiripu ma ménderu andajpenusĭnga ka eska i ambe úsĭnga uánikua xanhari sésikua íntskuni para úni nóteru ma k'amanharhintskua jatsinia.



Budismo

I relijionirhu anapuechaksĭ ísĭ exesĭndi eskachi uánikua xanhari andajpenusĭnga ka eskachi kómu nitamasĭnga mándani xanhari engachi niárajka irekani asta jĭáni jamberi engachi újka jurajkuni no sési ambe engachi tsitijka, no sési járhati úkuechani ka p'ikuarherakuechani. Uandasĭndiksĭ eska k'uiripu ma enga jánhaskakua jingoni jámajka, ambakiti ambe újka ka sési eratseni, úsĭnga niáran arini ambe úkuarhinchani enga arinhajka nirvana, o sea, tiempu ma nani enga k'amakurhijka kómu nitamakua.



Confucionismo

Diccionario de religiones comparadas uandasindi eskaksí imecha engaksí i k'uiripueri chúxapatika enga Confucio arhinhenga, ís'i exesínga eska kómu nitamakua jarhaska jimboka “ambe ma no úsinga sési uérani ka jimboka k'uiripu no sési ambe niátasinga”. Jiókuarhisindiksí eska no xáni kómu nitamakua ambe japiringa engaksí k'uiripuecha ambakiti ambe úpiringa. Joperuksí uandasindi eskachi sándurumindu kómu nitamasínga jimbokaksí jarhaska espirituecha engaksí sánduru uinhapitika eska k'uiripuecha. Ka eska ini ambe jimbo, k'uiripuechaksí solu jatsiska para jiókuarhini ambe enga uaxastakata jakaia eska úkuarhiaka.



Máru Africa anapu relijionicha

Máru Africa anapu relijionichaksí uandasindi eska k'uiripu kómu nitamasínga jimboka síkuamikua ambe jarhaska. Máru k'uiripuechaksí ís'i exesíndi eskaksí brujuecha úsinga úni eska nemaní sési nikuaka o eska no sési ambe úkuarhinjaaka ka eskaksí úsinga p'ikurhiantani mámaru ambe úparini. Ís'i jimbo, engaksí i k'uiripuecha p'amenchajka, síkuami ma jingonksí nirasíndi paraka imeri sípiati ambe ka ima ambe engaksí imecha újka, uáka p'ikurhintani ambe engaksí brujuecha úkuka.



Cristianismo

I relijionirhu anapuechaksí jakajkusíndi eska kómu nitamakua ambe jarhaska imani k'amanharhinskua jimbo engaksí Adani ka Eba úpka, ís'i eska na uandajka Bibliarhu anapu libru Génesis. Joperu uánikua k'uiripuechaksí niárástia uaxastani ambe engaksí imecha eratsejka. Por ejemplu, máru katolikuechaksí ís'i exesíndi eskaksí uáka Tata Diosíni jimbo kómu nitamakuarhini paraka ima újchakuraaka imecheri tiósiuni o paraka p'ímutantaaka máteru k'uiripuni.

**PARAJTSÍ
SÁNDERU
MÍTENI**

**Exe je pájinarhu jw.org bideuni
¿Jaipanhiantasíni Tata Diosí
iámindu relijionichani?**

1

¿TATA DIOSÍ ÚSĪNI ESKACHI KÓMU NITAMAKUARHIAKA?

¿Andisĩ jukaparhakue míteni?

Uánikua k'uiripu nóteru jiókuarhisĩndia Tata Diosĩni jimbokaksĩ eratsesĩnga eska imasĩ újka eskachi kómu nitamakuarhiaka.



Eratsi je arini ambe

Uékaparini o nómbe, uánikua relijioniri orhejtsĩ-kutichaksĩ niárastia jorhentpini eska Tata Diosĩsĩ újka eskachi kómu nitamakuarhiaka. Por ejemplu, máruksĩ uandasĩndi...

- ... eska Tata Diosĩri kastigu máeska enga no sési jánhaskuarhijka.
- ... eskaksĩ sapiicha uarhisĩnga jimboka Tata Diosĩ máteru ánjeli sapirhatichani uétarhinchani jarhasĩnga auandarhu.
- ... eska Tata Diosĩ jarhuajpisĩnga guerre-charhu enga xáni no sési jánhaskuarhijka.

Joperu ¿engaksĩ relijioniri orhejtsĩkuticha chkuanderakua ambe jorhentpikia Tata Diosĩri ambe? ¿Ka enga Tata Diosĩ no jaiapanhintajka ambe engaksĩ uandajka?

PARAJTSÍ
SÁNDERU
MÍTENI

Exe je pájinarhu jw.org
bideuni ¿Andisĩ uétarhijki
jorhenguarhini Bibliaeri
ambe?



Ambe engu Biblia uandajka

No Tata Diosĩ úsindi eskachi kómu nitamakuarhiaka

Engu Tata Diosĩ úpiringa eska k'uiripu kómu nitamakuarhiaka, no terukuntapirindi imeri ambakiti úkuecha jingoni. Por ejemplu, Biblia uandasindi:

“Jimboka iámindu imeeri xanharuecha jurhimbikakĩ. Tata Diosĩ ma [...] engu no no sési ambe újka; ka engu jurhimbikueka” (**DEUTERONOMIO 32:4**).

“¡No uétarhisindi ni sikiera eratseni eska Tata Diosĩ jurhimbikiti no sési jási ambe niátasinga, eska ima engu iámindu ambe újka Úni, no jurhimbikuecha jingoni uáka ambe ma!” (**JOB 34:10**).

“Tata Diosĩ engu iámindu ambe újka úni, nómindu úsindi imani ambe engu no jurhimbikitiika” (**JOB 34:12**).

Tata Diosĩ no jaiapanhiantasindi relijionichani engakĩ chkuanderakua ambe uandajka imeri ambe

Por ejemplu, no jaiapanhiantasindi imani relijionichani engakĩ jorhentiipijka eska Tata Diosĩ úsinga eskachi kómu nitamakuarhiaka ni imechani engakĩ jiókuarhijka eskakĩ guerreacha jauaka ka no sési kámberekua.

“Profetechakĩ profesiauechani uandaaxati juchiti nombrini úrparini [Tata Diosĩ] engakĩ chkuanderakua ambeka. No ji axaaska, ni juramukua ni uanda ambe ma. Ambe engakĩni arhini jaka eska úkuarhiaka bisioni máesti engu no ísika [...] ka chkuanderakuecha engakĩ imecheri mintsitarhu anapueka” (**JEREMÍAS 14:14**).

Jesusi uandaspti eskakĩ relijionirhu anapuecha máru ísku aparicheska

“No iáminduecha engajtsini arhijka: ‘Tata, Tata’ inchaatikĩ auandarhu anapu juramukuarhu, solu imecha engakĩ újka eska juchiti Táti auandarhu anapu na jaiapanhintajka. Imani jurhikatikua jimbo, uánikuechajtsini arhiati: ‘Tata, Tata, ¿nóchi uandajtsikpiski jucha chíti nombri jimbo ka chíti nombri jimbo petarhitaantanchi Noambakitiri espirituuechani, ka chíti nombri jimbo uánchi uánikua milagruuechani?’. Ka jimajkani ji arhiauaka: ‘Nóksini méni miteska. Késtakuechajtsini je cha no sési úricha’” (**MATEU 7:21-23**).

¿Tata Diosĩ úsini eskachi kómu nitamakuarhiaka?

Eranhaska je arini ambe: táti ma sési k'uiriperaasindi imeri sapiichani ka íntsaani ambe engakĩ uétarhinchajka. Tátsekua, máechakua nóteru uékasindia kurhajchani, máteru nani nirasindi irekani ka uandanhiatechani jatsiani. ¿Uandapirintsĩ eska táti jémba úska eska sapi indeni ambe úpiringa? ¿Sési japirini eska sapi uandapiringa eska táti jémba úska eska no sési nitamakuarhipiringa imeri úkuecha jimbo? Méntku nómbé. Májkueni, juchajtuchi no méni jatsipiringa para uandani eska Tata Diosĩ úsinga eskachi kómu nitamakuarhiaka.

Jiájkani, ¿jucha jirinhakuarhijki ini ambe?

Exe je kurhamarhikua 2.

2

¿JUCHA MISMU ÚSĪNI ESKACHI KÓMU NITAMAKUARHIAKA?

¿Andisĩ jukaparhakue míteni?

Engachi jucha jirinhakuarhipiringa kómu nitamakua ambe, jiájkanchi úpiringa ambe ma úni parachi nóteru xáni kómu nitamania.



PARAJTSĪ
SÁNDERU
MÍTENI

Exe je pájinarhu
jw.org bideuni
¿Andisi kueraa
Tata Diosĩ
Echerini?

Eratsi je arini ambe

¿Na xánchi jucha mismo úsĭni eska ari ambe úkuarhiaka engu újka eska kómu nitamakua ambe jauaka?



No sési kámberakua

Organización Mundial de la Salud (OMS) uandasĩndi eska mándani t'ámu k'uiripu k'é-raticha jimbo ma k'uiripu niáraska no sési kánhani jiáni engu sapi máepka, ka eska mándani tanimu nanakecha jimbo ma nana niáraska ma tiempu jimbo no sési kánhani o ikichakueni jási ambe úminhani (o i tsimani ambe).



P'amenchakuecha

Karakatarhu ma rebisteri *National Geographic*, uarhiiti karari ma engu Fran Smith arhinhajka, uandasĩndi eska parhakpinirhu, jukari 1,000 mioni k'uiripuechaksĩ itsutasinga ka eska tabaku jindeska ma ambe jimbo engaksĩ k'uiripuecha sánderu uarhiijka, por ejemplu, mintsita anhxustani jámani, kamatsĩtarhu no sési ambe úkuarhinchani ka kánseri p'irani pulmonicharhu.



Engachi uarhiranchajka nemani

Seguni *Estadísticas sanitarias mundiales 2018* (inglesi jimbo) OMS aianhpisti eska uéxurhini 2016 jimbo niáraska 477,000 k'uiripuecha uándikunhani interu parhakpinirhu. No kuenta úpariani ma 180,000 k'uiripuechanisĩ engaksĩ ini mismo uéxurhini uarhika guerregarhu o máteru ambe jimbo.



Nóksĩ iáminduecha májkueni kánhani

Uarhiiti ma engu Jay Watts arhinhajka ka engu k'uiripuecheri eratsekua ambe estudiarijka, uandasĩndi: “No jatsikuarhikua ambe, engaksĩ no iáminduecha májkueni jatsikuarhijka tumina, no kúrhiani imechani engaksĩ máteru jási kolorika, no jukaparharaani takechani o nanakechani, sánderu k'éri p'ikuarherani máteruecha jingoni, k'umanchikuarhu chútanhani i ambe úsĩndi eska nema niáraaka no nani máru p'ikuarherani, uandanhiani o kómu p'ikuarherani”.

Ambe enga Biblia uandajka

Enga xáni kómu nitamakua ambe jaka jindesti jimboka sáno méntkisí k'uiripu níarasínga úni eska i ambe úkuarhiaka

Sáno iámindu i ambe jindesti jimbokaksí gobier-nuecha úsínga eska k'uiripu no uáka sési irekani.

“K'uiripu juramukusíndi máteru k'uiripuni solu para no sési ambe úkuni” (ECLESIASTÉS 8:9).

Uákachi no xáni uandanhiatechani jatsiani

Ambe enga Biblia uandajka jarhuatasíndijtsíni no xáni p'amenchani ka eskachi sánderu sési pájperaaka máteruecha jingoni.

“Mintsita trankilu ma sési úkusíndi kuerpuni, peru se-losueni tereraasíndi únichani” (PROVERBIOS 14:30).

“Ásteru ikiancha je, sino késtata je chári mintsite-charhu iámindu ikiakua, ka kurhurjaxekua, ka uinha-chatsperakua ambe ka arhinchperakua ka iámindu ambe engajtsí jimbo no sési útsperakuekajka” (EFESU 4:31).



¿Jucha mismu úsini eskachi kómu nitamakuarhiaka?

Biblia arhisíndi: “Jimboka iámindu ambe enga ma k'uiripu júskaaka, indeni ambemindu p'ikuntaaka” (Galasia 6:7). Ménisíchi kómu nitamakuarhisínga jimbokachi no sési erakusínga ambe engachi uáka. Jimbojtsínisí doktori-cha arhijti eskachi imani ambe auaka engajtsíni marhuachiaka, ejersisiu úni ka no kámani imani ambe engajtsíni no sési úchiaka komu itsutani. Jo-peru ístuchi no uáka uandani eska iámindu ambe jimbo engachi xáni kómu nitamajka jucha mismu jirinhakuarhisínga. Né uéjki uáti no sési jási ambe úkuarhinchani, no sési nitamakuarhini enga no sési jánhaskuarhini ja-rhajka o máteru ambe jimbo.

Jiájkani, ¿andiksísi ambakiti k'uiripuecha kómu nitamakuarhijki?

Exe je kurhamarhikua 3.

3

¿ANDIKSĪSĪ AMBAKITI K'UIRIPUECHA KÓMU NITAMAKUARHIJKI?

¿Andisĭ jukaparhakue míteni?

Xáni no sési engaksĭ ambakiti k'uiripuecha kómu nitamakuarhijka. Indeni k'uiripuechani exepariani, nema úpirindi eratseni eska no ué-tarhisĭnga jánguarhintani sési úni ambe ma.



Eratsi je arini ambe

Máru k'uiripuechaksĭ ísĭ jakajkusĭndi eskachi uánikua xanhari niárasĭnga uarhini ka ménderu andajpenuni. Eratsesĭndiksĭ eska engachi ambakiti ambe uáka iásĭ engachi irekani jaka, niáraakachi ambakiti irekua ma jatsini jiáni engachi ménderu andajpenuakia, peru eska engachi no sési ambe úska, kánikuaĭtsĭni no sési nicheaka. Seguni i jakajkukua, k'uiripu ma uáti kómu nitamakuarhini enga no sési ambe úpka imani tiempuni jimbo enga antesi irekapka. Peru kurhamarhikuarhi je:

- ¿Para ambeĭtsĭni marhuachipirini iásĭ kómu nitamani ambe ma jimbo engachi imani tiempu jimbo úpka engachi antesi irekapka ka engachi ni miájka?
- ¿Para ambe xáni jánguarhintani úni ambe ma parachi no p'amenchani ka parachi no no sési ambe úkuarhinchani ka k'óru t'uini uaxastakata jarhania na engachi irekaaka seguni ambe engachi úpka ima tiempu jimbo engachi antesi irekapka?



**PARAJTSĪ
SÁNDERU
MÍTENI**

Exe je pájinarhu
jw.org bideuni ¿Andisĭ
Tata Diosĭ jurajkuni jaki
eska jauaka kómu
nitamakua ambe?

Ambe engu Biblia uandajka

Kómu nitamakua no Tata Diosĩri kastiguesti

Uánikua xanhari i ambe úkuarhisĩndi jimbokachi jimesĩ jarhasĩnga ka jiáni engu no sési ambe úkuarhijka.

“Ima engu sánderu uirijika, no méntkisi andasĩn-[di], ka níjtu engu sánderu uinhapika, andajki guerrani, ka niksĩ mimixeticha jatsijki méntkisi t’irekua, ka niksĩ jánhaskaticha jatsijki méntkisi tumina, ka niksĩ méntkisi sési exenhani imecha engaksi jorhenaka, jimboka méntkisi úkuarhisĩnga o jarhasĩnga ambe ma engu ma no erokuarhijka” (ECLESIASTÉS 9:11).

Kómu nitamakuarhisĩngachi jimbokachi k’amanharhinskua jingoni andajpenusĩnga

Sáno méntkisi, k’uiripuechaksi úrasĩndi uandakuani *k’amanharhinskua* paraksi imani ambe arhikuekani engachi no sési ambe újka. Joperu Bibliarhu istu úrakuarhisĩndi para arhikuekani imani k’amanharhinskuanu engu Adani ka Eba kéritaka iámindu k’uiripuechani, nájkiruka nema ambakiti k’uiripu máeka o nómbu.

“Exe, engani andajpenupka t’uini no sési úrispkia ka jiáni uératini k’amanharhintstiska desde engarini juchiti nándi kánguarhika” (SALMO 51:5).

K’amanharhinskua jimbo, k’uiripuechaksi kánikua no sési jási ambe úkuarhinchasĩndi

K’amanharhinskua, no solu ústi eskachi nóteru sési pájperaakia juchari Kuerajpiri jingoni, sino istu iámindu imani ambe jingoni engu ima kueraaka, komu máteru k’uiripuecha jingoni. I ambe úsĩndi eskachi iáminduecha kánikua kómu nitamakuarhiaka.

“Engani uékani jarhajka úni ambakiti ambe, [...] solu no sési jási ambe jarhas[sĩndi] juchiti mintsitarhu” (ROMA 7:21).

“Ka míteskachi eska iámindu ambe engu kueraakateka, asta iási jamberi kánikua tekaantaxaka ka asta uerani jamberi” (ROMA 8:22).

¿Andiksisi ambakiti k’uiripuecha kómu nitamakuarhijki?

Iámindu k’uiripuecha, ambarhaticha ka no sési úricha, níarasĩngachi kómu nitamakuarhini jimbokachi k’amanharhintstiska. Jimbochisi p’amenhajka, kómu p’ikuarherani ka imani ambe úni engachi no sési ambe úkuajka máteruechani.

Jiájkani, ¿i ambesi uékeni Tata Diosi?
¿Kueraaskijtsini parachi kómu nitamakuarhini?

Exe je kurhamarhikua 4.

4

¿TATA DIOSİJTSİNI KUERAASKI PARACHI KÓMU NITAMAKUARHINI?



¿Andisĩ jukaparhakue mĩteni?

Jimboka i ambe úsĩnga eskachi ménderueni exeaka juchari tsípikuani.



Eratsi je arini ambe

¿Andisĩ Tata Diosĩ xáni sési jásĩ ambe kueraapi-rini parhakinirhu engá ístu uékapiringa eska-chi kómu nitamakuarhipiringa?

Máru k'uiripuecha engaksĩ no ma relijioni ja-tsika, uandasĩndiksĩ eskachi kómu nitamakua-rhisinga jimboka Tata Diosĩ no uandanhiasĩnga juchantsĩni jimbo o astaksĩ uandasĩndi eska no jarhaska Kuerajpiri ma. Ísĩksĩ eratsesĩndi eska kómu nitamakua arini tanimu ambe xa-rhataĩnga: 1) eska Tata Diosĩ no úsĩnga k'a-majkuni, 2) eska no uékasĩnga ísĩ úni o 3) eska Tata Diosĩ no jarhaska.

Joperu ¿jaki máteru ambe engachi jimbo kómu nitamakuarhijka?

**PARAJTSİ
SÁNDERU
MİTENİ**

Exe je pájinarhu jw.org
bideuni ¿Andichisĩ uá
mintsikani eska Biblia
jurhimbĩtku uandasĩnga?

Ambe enga Biblia uandajka

Tata Diosijtsini no kueraasti parachi kómu nitamakuarhini

Ima uékasindi eskachi tsípihua jingoni irekaaka.

“No jarhas[ti] sánderu ambakiti ambe para imecha, eskaksi tsípikuarhiaka ka imani ambeksi úni enga sési jaka na engaksi xáni irekaaka, ka ístu eskaksi iáminduecha t'ireaka ka itsimani, ka eskaksi tsípikuarhiaka imecheri ánychikuarhita jimbo. I ambe Tata Diosiri intsimperata máesti” (ECLESIASTÉS 3:12, 13).

Enga Tata Diosi kueraapka Adani ka Ebani, iámindu ambe sési jarhaspti

Tata Diosi no uékasirendi eskaksi Adani ka Eba kómu nitamakuarhipiringa ni imecheri uájpecha.

“Tata Diosi újchakuraaspti ka [...] arhiaspti: ‘Kánguarhia je sapiichani ka uánikua úkuarhi je ka uinira je echerini ka ánychita je’” (GÉNESIS 1:28).

Orheta temungurhiri no uékaspti kurhajchani Tata Diosini

Engaksi ísi no kurhandirapka, úspti eskaksi kánikua kómu nitamakuarhipiringa imecha ka ístu imecheri uájpecha.

“Ísi jimbo eska pekadu na juka parhakpinirhu, máechakua k'uiripuni jimbo ka pekaduni jimbo uarhikua, ka ísi uarhikua pakarani para iámindu k'uiripuecha jimbokaksi iáminduecha pekadu úska” (ROMA 5:12).*

* Biblia úrasindi uandakuani *k'amanharhinskuu*, no solu para imani ambe arhikuekani engachi *no sési ambe újka*, sino ístu para imani *k'amanharhinskuani* arhikuekani engachi iámindu k'uiripuecha kérikuarhika.

Tata Diosijtsini no kueraasti parachi jandiajku orhepani uérani

Ísi eskachi na no kueraanhaka parachi úni itsirhu irekani, ístuchi no kueraakata jarhaska parachi jucha mismu juramukuarhini.

“K'uiripu enga xanharani jaka ni sikiera sésikua jatsi para exeni nani enga ísi jatsika para xanharani” (JEREMÍAS 10:23).

Tata Diosi no uékasindi eskachi kómu nitamakuarhiaka

Imajtsini íntsaasindi consejuechani parachi no xáni uandanhiatechani jatsiani.

“¡Engari meru kurhajchaapiringa juchiti mandamien-tuechani! Jimajkani chíti pínandikua niárapirindi ísiini eska riu ma” (ISAÍAS 48:18).

¿Tata Diosijtsini kueraaski parachi kómu nitamakuarhini?

Nómbe. Tata Diosi no méni uékaspti eskachi ísi irekapiringa. Kómu nitamakuarhisíngachi jimboka orheta temungurhiri nóteru uékaspti kurhajchani Tata Diosini. Joperu inde ambe no arhikuekasindi eska-chi méntki si kómu nitamakuarhiaka.

¿K'amakurhia ma jurhiani kómu nitamakuu?

Exe je kurhamarhikua 5.

5

¿K'AMAKURHIA MA JURHIANI KÓMU NITAMAKUA?

¿Andisĩ jukaparhakue míteni?

Mintsikani eska k'amakurhiaka kómu nitamakua, jarhuataatijsĩni parachi sánderu tsípikua jingoni irekani ka eskachi nóteru no sési ambe eratseakia Tata Diosĩri ambe.



PARAJTSÍ
SÁNDERU
MÍTENI

Exe je pájinarhu
jw.org bideuni
¿Ambeski
Tata Diosĩri Reinu?

Eratsi je arini ambe

Uánikua k'uiripuechaksĩ uékapirindi k'amajkuni kómu nitamakua ambeni peruksĩ no úsĩndi. Exe je arini ambe:

Nájkiruka sánderu jakaia sĭpiati ambe...,

- ... p'amenchakuecha komu mintsita anaxustani jámani, jindesti ma ambe jimbo engaksĩ k'uiripuecha sánderu uarhijka.
- ... mándani uéxurhini, uánikua k'uiripuechaksĩ uarhisĩndi kánseri jimbo.
- ... rebistarhu *Frontiers in Immunology* doktori David Bloom uandaspti: "Parhakpinirhuksĩ se-guirixati jarhani k'éراتi p'amenchakuecha engaksĩ sóntku etsakurhijka. Ístuksĩ máteru p'amenchakuecha xarharaxati engaksĩ ístu sóntku etsakurhijka oksĩ ménderu xarhantani imecha engaksĩ nóteru japkia".

Nájkiruka máru paisicharhu kánikua tumina jaka...,

- ... mándani uéxurhini, uánikua sapiichaksĩ uarhisĩndi, sánderu imani lugaricharhu enga no káni jatsikuarhinhaka.
- ... uánikua k'uiripuechaksĩ imani lugaricharhisĩ irekasti nani enga no jaka nani tsĩtani basura ni drenajirhu anapu itsĩ.
- ... uánikua k'uiripuechaksĩ no jatsisti itsĩ ambanharhi.

Nájkiruka iásĩ sánderu mitekuarhikia ambe engaksĩ k'uiripuecha sésikua jatsika para úni...,

- ... útasĩksĩ uánikua lugaricha jimbo piaasĩndi ka íntspikuarhiani k'uiripuechani. Seguni infor-mi ma enga Naciones Unidas úpka, jamberi ima paisicha engaksĩ no kénditajka ini xáni no sési jási ambe, "nóksĩ exejti na enga xáni k'éri uandanhiata máeka oksĩ no míteni néna k'amajkuni".



Ambe engu Biblia uandajka

Tata Diosi uandhiasi ndi juchantsini jimbo

Tata Diosi no sesi pikuarherasindi engachi jucha kómu nitamakuarhijka.

“Jimbo ka ima [Tata Diosi] no isku exeska ni ikichani na engu xani kómu nitamajka ima engu no sesi pikuarherajka; no kénditakusindi imeri jarhuajperatani. Engu uinhachaparini kurhakupka eska jarhuatapinga, ima kurhaaspti” (**SALMO 22:24**).

“Jurajkua je iámindu chári pendientichani imani jingoni, jimbo ka ima pendienti pásinga chánsini jimbo” (**1 PEDRU 5:7**).

Nóchi méntkisi kómu nitamakuarhiaka

Biblia aiatspisindi eska Tata Diosi k’amajkuaka kómu nitamakua ambe.

Tata “Diosi kutsunharhikauati iámindu uekua, ka nóteru jauatia uarhikua, ka ni uandanhia, ka nóteru nema ueraati” (**JAJASKUECHA 21:3, 4**).

Tata Diosi k’amajkuati iámindu imani ambe engachi jimbo kómu nitamakuarhijka

Para isi úni, imeri Juramukuani úraati, isi eska na uandajka Biblia ambakiti juramukua máesti.

“Tata Diosi auandarhu anapu, gobiernu ma uaxastaati engu no méni k’amajkunhaaka. Ka i gobiernu no jindeuati para máteru ireta. [...] Ka imajkusi jauati para méntkisi” (**DANIEL 2:44**).

K’amakurhia ma jurhiani kómu nitamakua?

Jo, peru no jimbokaksi k’uiripuecha xani jánguarhintaaka. Juramutichaksi solu máru ambejkusi újti kénditani, joperu Tata Diosi k’oru uati k’amajkuni imani ambe engu újka eska jauaka kómu nitamakua ambe. Ka para isi úni, imeri Juramukuani úraati.



NANI ENGACHI UÁKA EXENTANI JARHUAJPERATA

¿Uarhirakuarhiskijtsĩ familiarini ma o
amiguni ma?

- Incha je pájinarhu jw.org ka kara je “Jauati
tsintsua”, jima enga jindeka para jirinhantani.

¿Nójtsĩ andangutasĩni tumina?

- Incha je pájinarhu jw.org ka kara je “Néna sési
úrani tuminani”, jima enga jindeka para jiri-
nhantani.

¿Ménisijtsĩ kurhamarhikuarhiski andichisĩ
irekani jaki?

- Incha je pájinarhu jw.org ka kara je “¿Andisĩ
jukaparhakue seguirini irekani?”, jima enga
jindeka para jirinhantani.

¿K'éri p'amenchakuajtsĩ ma kámasĩni?

- Incha je pájinarhu jw.org ka kara je “K'éri
p'amenchakua ma kámani”, jima enga
jindeka para jirinhantani.

Biblia uánikua ambakiti
konsejuechani jataasti
para iámindu familiarhu
anapuecha. K'uiripuecha
engaksĩ úraajka, sánderuksĩ
jánhaskatisĩndi ka eratsekua
jukarini (**PROVERBIOS 1:1-4**).

P'imarhisĩngaksĩni parajtsĩ
cha mismu jirinhantani
ambe enga Biblia uandajka.
Exe je bideuni ¿Andisĩ
uétarhijki jorhenguarhini
Bibliaeri ambe? Exentakajtsĩ
pájinarhu jw.org o engajtsĩ
eskaniariuaka kodiguni QR.



Késku je gratisi
ini rebistani ka
engaksĩ antesi
uéraaka



Arhinta je Bibliani
Internetirhu;
jarhasti jukari 200
idiomecha jimbo

Exe je jw.org® o
eskaniari je ini
kódiguni



920.2-THS
200217